

Z A K O N O SJEMENU I SADNOM MATERIJALU POLJOPRIVREDNOG BILJA

I - OSNOVNE ODREDBE

Član 1.

Ovim zakonom uređuje se proizvodnja, promet i uvoz poljoprivrednog sjemena, presadnica, micelija jestivih i ljekovitih gljiva, sadnog materijala i druga pitanja od značenja za provođenje jedinstvenog sistema poljoprivrednog sjemenarstva i rasadničarstva na teritoriji Federacije Bosne i Hercegovine (u daljem tekstu: Federacija).

Član 2.

U smislu ovog zakona pojedini izrazi imaju slijedeća značenja:

1. Poljoprivredno sjeme su generativni ili vegetativni dijelovi poljoprivrednog bilja koji služe za umnožavanje poljoprivrednog bilja u ratarstvu, povrtlarstvu, cvjećarstvu i generativnih podloga u voćarstvu;
2. Poljoprivredno sortno sjeme je predosnovno sortno sjeme i sjemenske kategorije koje se proizvode višestrukim cikličnim umnožavanjem predosnovnog sjemena domaćih i stranih sorti poljoprivrednog bilja priznatih u Federaciji i lokalne i prirodne populacije kulturnog bilja kao eko-tipovi, klonovi i slično, koje se nalaze u proizvodnji i koje su upisane u listu domaćih, stranih i odomaćenih stranih sorti poljoprivrednog bilja u Federaciji (u daljem tekstu: sorte koje su priznate u Federaciji);
3. Sorta poljoprivrednog bilja (u daljem tekstu: sorta) skupina je biljaka unutar najniže botaničke sistematske jedinice koja se odlikuje: izražajnošću svojstva određenog genotipa ili kombinacije genotipova, razlikovanjem od bilo koje druge sorte prema barem jednom od navedenih svojstava, te kao cjelina ostaje nepromijenjena nakon umnožavanja ili na kraju svojstvenog ciklusa umnožavanja;
4. Poljoprivredni sadni materijal su sadnice koje služe za podizanje voćnjaka i vinograda, te cvijeće, ruže, ukrasno grmlje i drveće kao i reprodukcioni materijal za proizvodnju sadnica;
5. Reprodukcionni sadni materijal za proizvodnju sadnica jeste sjeme za proizvodnju podloga, vegetativne podloge, korjenjaci, korijenov izdanak, zrele i zelene reznice plemke i meristem, ako potiču od selekcionisanih matičnih, elitnih matičnih i priznatih (originalnih) matičnih stabala ili grmova sorata i podloga;
6. Voćna sadnica je jednogodišnja ili višegodišnja biljka nastala iz vegetativnih dijelova matične biljke ili spajanjem podloge i plemke ili je uzgojena iz sjemena matične biljke;
7. Presadnica je biljni materijal dobiven generativnim ili vegetativnim putem, a služi za umnožavanje poljoprivrednog bilja.

Član 3.

Poslove u području sjemenarstva i rasadničarstva utvrđene ovim zakonom obavljaju Federalno ministarstvo poljoprivrede, vodoprivrede i šumarstva (u daljem tekstu: Federalno ministarstvo), kantonalna ministarstva mjerodavna za poslove poljoprivrede (u daljem tekstu: kantonalno ministarstvo), kao i naučne ili naučno-istraživačke ustanove i druge ustanove koje ispunjavaju uslove utvrđene ovim zakonom, a koje ovlasti Federalno ministarstvo.

Član 4.

U obavljanju poslova sjemenarstva i rasadničarstva poljoprivrednog bilja, Federalno ministarstvo vodi slijedeće registre:

1. Registar proizvođača poljoprivrednog sjemena, presadnica i micelija jestivih i ljekovitih gljiva (u daljem tekstu: Registar proizvođača sjemena);

2. Registar dorađivača poljoprivrednog sjemena (u daljem tekstu: Registar dorađivača sjemena);
3. Registar proizvođača poljoprivrednog sadnog materijala (u daljem tekstu: Registar proizvođača sadnog materijala);
4. Registar uvoznika poljoprivrednog sjemena, sadnog materijala, presadnica i micelija (u daljem tekstu : Registar uvoznika);
5. Registar laboratorija za kontrolu kvaliteta poljoprivrednog sjemena.

Uslove koje moraju zadovoljavati privredna društva, ustanove i druga pravna lica (u daljem tekstu: pravna lica) za upis u registre iz stava 1. ovog člana, te sadržaj, oblik i način vođenja registara, propisuje federalni ministar poljoprivrede, vodoprivrede i šumarstva (u daljem tekstu: federalni ministar).

Član 5.

Federalno ministarstvo donosi rješenje o upisu u registre iz člana 4. ovog zakona na zahtjev pravnih lica, ako ta pravna lica zadovoljavaju uslove propisane ovim zakonom i propisima donesenim na osnovu ovog zakona i ako imaju pisanu saglasnost kantonalnog ministarstva.

Federalno ministarstvo će rješenjem brisati pravno lice upisano u registar iz člana 4. ovog zakona, na njegov zahtjev, odnosno kada utvrdi da je prestalo zadovoljavati uslove propisane ovim zakonom i propisima donesenim na osnovu ovog zakona.

Lista pravnih lica na osnovu pravosnažnog rješenja iz st. 1. i 2. ovog člana objavljuju se u "Službenim novinama Federacije BiH".

II - POLJOPRIVREDNO SJEME

1. Kategorije poljoprivrednog sjemena

Član 6.

Kategorije poljoprivrednog sortnog sjemena su:

1. Predosnovno sjeme (elitno sjeme) proizvodi i održava stvaraoc sorte, odnosno pravno lice na koje je stvaratelj sorte prenio pravo održavanja ili registrovani umnoživač umnožavanjem odabranih biljaka izvorne generacije priznatih sorti poljoprivrednog bilja u Federaciji.
2. Osnovno sjeme (originalno sjeme) proizvodi se iz predosnovnog sjemena pod kontrolom stvaraoca sorte ili ovlaštenog umnoživača.
3. Certifikovano sjeme prve generacije (sjeme prve sortne reprodukcije) proizvodi se umnožavanjem osnovnog sjemena.
4. Certifikovano sjeme druge generacije (sjeme druge sortne reprodukcije) proizvodi se umnožavanjem certifikovanog sjemena prve generacije ili sjemena viših kategorija.
5. Certifikovano sjeme treće generacije (sjeme treće sortne reprodukcije) proizvodi se umnožavanjem certifikovanog sjemena druge generacije ili sjemena viših kategorija.
6. Priznato sortno (proizvodno) sjeme duhana, krmnog i povrtnog bilja, izuzev sjemena krumpira, bez obzira na broj reprodukcija, a ovisno od sortne čistoće i zdravstvenog stanja.
7. Samooplodna linija (sjeme samooplodnih linija) jeste potomstvo homozigotne biljke uzgojene u kontrolisanoj samooplodnji u toku više generacija pod kontrolom stvaraoca sorte.
8. Jednostruki hibrid (SC) jeste prva generacija križanja dvije samooplodne linije.
9. Dvostruki hibrid (DC) jeste prva generacija križanja dva jednostruka hibrida.
10. Trostruki hibrid (TWC) jeste prva generacija križanja jedne samooplodne linije i jednostrukog hibrida .

2. Proizvodnja poljoprivrednog sjemena

Član 7.

Poljoprivredno sjeme (u daljem tekstu: sjeme) mogu proizvoditi pravne osobe (u daljem tekstu: proizvođač sjemena) koje su upisane u Registar proizvođača sjemena.

Izuzev stava 1. ovog člana proizvodnjom sjemena mogu se baviti i fizička lica na osnovu pisanog ugovora o saradnji sa proizvođačem sjemena, a sjeme proizvedeno u toj saradnji smatra se proizvodnjom proizvođača sjemena.

Proizvođač sjemena može proizvoditi samo sjeme sorti koje su priznate u Federaciji, a za sorte za koje je podnesen zahtjev za priznavanje odnosno odobravanje uvođenja u proizvodnju na teritoriji Federacije može postojati samo eksperimentalna proizvodnja do priznavanja u Federaciji.

Vrste sjemena koje nije dopušteno uzgajati i umnožavati na određenim područjima Federacije propisuje federalni ministar.

Zavisno o vrsti i vremenu proizvodnje sjemena, proizvođači sjemena dužni su o masi proizvedenog sjemena izvijestiti Federalno ministarstvo i kantonalno ministarstvo na kraju proizvodnog ciklusa, a najkasnije do 31. decembra tekuće godine.

3. Stručni pregled nad proizvodnjom sjemena

Član 8.

Sjemenski usjev za proizvodnju sjemena u toku vegetacije podliježe obaveznom stručnom pregledu.

Izuzev stava 1. ovog člana biljne vrste cvijeća, ljekovitog i aromatičnog bilja ne podliježu obaveznom stručnom pregledu.

Stručnim pregledom sjemenskog usjeva utvrđuje se: vrsta, sorta, kategorija, porijeklo upotrijebljenog sjemenskog materijala, autentičnost i čistoća vrste i sorte, prostorna izolacija usjeva, zdravstveno stanje usjeva, prisutnost korova, opšte stanje i razvoj usjeva, predusjev, primijenjene agrotehničke mjere i očekivani prinos naturalnog sjemena i drugo propisano metodologijom o sprovođenju stručnog pregleda, s tim što se kod nesortnog sjemena ne utvrđuje sorta, kategorija, autentičnost i čistoća sorte.

Član 9.

Stručni pregled nad proizvodnjom predosnovnog i osnovnog sortnog sjemena i samooplodnih linija obavlja stvaraoc sorte ili naučna ili naučno-istraživačka ustanova koju ovlasti federalni ministar (u daljem tekstu: nadležna ustanova), a o pregledu i nalazu koji je pri pregledu utvrđen, dužan je izvijestiti Federalno ministarstvo.

Stručni pregled nad proizvodnjom certificiranog sjemena, prve, druge i treće generacije, priznatog (proizvodnog), te jednostrukih, dvostrukih, trostrukih i ostalih hibrida vrši nadležna ustanova.

Nadležna ustanova iz stava 1. ovog člana je dužna izvještavati Federalno ministarstvo o obavljenom stručnom pregledu na kraju proizvodnog ciklusa, a najkasnije do 31. decembra tekuće godine.

Način i metodologiju po kojoj će se provoditi stručni pregled nad proizvodnjom sjemenskog usjeva pojedinih biljnih vrsta, uzorak izvještaja i stepen obrazovanja službenika za obavljanje stručnog pregleda propisuje federalni ministar.

Član 10.

Nakon izvršenog stručnog pregleda nad proizvodnjom sjemenskog usjeva i na temelju nalaza stručnog pregleda, mjerodavna ustanova izdaje uvjerenje o priznavanju sjemenskog usjeva (u daljem tekstu: uvjerenje) najkasnije 15 dana od posljednjeg pregleda.

Mjerodavna ustanova dužna je voditi evidenciju o izdanim uvjerenjima iz stava 1. ovog člana.

Uzorak uvjerenja iz stava 1. ovog člana, te sadržaj, oblik i način vođenja evidencije iz stava 2. ovog člana propisuje federalni ministar.

Član 11.

Ako proizvođač sjemenskog usjeva učini propust u bilo kojoj fazi proizvodnje sjemenskog usjeva mjerodavna ustanova će poduzeti mjere da se utvrđeni nedostaci uklone ili unište.

4. Dorada sjemena

Član 12.

Dorada sjemena je sušenje, čišćenje, kalibriranje, piliranje, tretiranje zaštitnim sredstvima, ispitivanje kvaliteta, pakiranje, plombiranje i deklariranje.

Sjeme prije stavljanja u promet mora biti doručeno.

Član 13.

Sjeme može doručivati pravna osoba (u daljem tekstu: doručivač sjemena) koja je upisano u Registar doručivača sjemena.

U rješenju o upisu doručivača sjemena u Registar iz stava 1. ovog člana moraju biti naznačene vrste i kategorije sjemena koje doručivač sjemena ima pravo doručivati.

Član 14.

Ako je sjeme određene vrste i sorte doručivalo više doručivača sjemena, smatra se da je sjeme doručio doručivač koji je posljednji doručivao sjeme.

Doručivač sjemena dužan je voditi evidenciju o masi preuzetog naturalnog sjemena i doručenog sjemena.

Sadržaj, oblik i način vođenja evidencije iz stava 2. ovog člana propisuje federalni ministar.

Član 15.

Doručivač sjemena može u postupku dorade pripremati mješavine različitih vrsta i sorti poljoprivrednog bilja u različitim omjerima pojedinih komponenti .

Svaka od komponenti sjemena u mješavini mora zadovoljavati uslove kvaliteta za tu vrstu poljoprivrednog bilja.

Naturalno sjeme sitnosjemenih mahunarki mora se u cijelosti isporučiti doručivaču sjemena.

Doručivač sjemena dužan je uništiti otpad nastao doradom sjemena iz stava 3. ovog člana pod nadzorom mjerodavnog kantonalnog ili federalnog poljoprivrednog inspektora.

Član 16.

Dorađivač sjemena ne smije dorađivati naturalno poljoprivredno sjeme ako za to sjeme nema uvjerenje o priznanju sjemenskog usjeva iz člana 10. stav 1. ovog zakona.

Izuzev stava 1. ovog člana, za biljne vrste iz člana 8. stav 2. ovog zakona dorađivati se može i sjeme koje nema uvjerenje o priznanju sjemenskog usjeva.

Član 17.

Tokom žetve, odnosno berbe, prijevoza, čuvanja do dorade, naturalno sjeme sorte i kategorije mora biti međusobno odvojeno i označeno.

Za naturalno sjeme koje se prevozi od njive do mjesta skladištenja odnosno čuvanja potrebno je obezbjediti podatke o proizvođaču, katastarskoj čestici, vrsti, sorti i kategoriji naturalnog sjemena.

5. Kvalitet sjemena

Član 18.

Kvalitet sjemena, u pogledu ovog zakona, je čistoća, vlaga, klijavost i zdravstveno stanje sjemena.

Član 19.

Kvalitet sjemena mora se utvrditi za svaku partiju sjemena, prije stavljanja u promet.

Partija sjemena, u pogledu ovog zakona, je najveća propisana masa vrste, sorte i kategorije sjemena proizvedena iste godine za koju se utvrđuje kvalitet.

Masu sjemena za pojedine vrste bilja iz stava 2. ovog člana koja čini partiju propisuje federalni ministar.

Član 20.

Osnovne zahtjeve o kvalitetu sjemena uz saglasnost Zavoda za standardizaciju, mjeriteljstvo i patente propisuje federalni ministar.

Kvalitet sjemena utvrđuje dorađivač sjemena i laboratorija iz člana 4. stav 1. tač. 2. i 5. ovog zakona.

Za kvalitet sjemena odgovara dorađivač sjemena.

6. Pakiranje i deklariranje sjemena

Član 21.

Sjeme u prometu mora odgovarati propisanim osnovnim zahtjevima o kvalitetu, mora biti pakirano i imati deklaraciju uz otpremnicu i deklaraciju na ambalaži.

Za podatke naznačene u deklaraciji odgovorno je pravno lice koja ih je izdala.

Način pakiranja i deklarisanja sjemena iz stava 1. ovog člana propisuje federalni ministar.

Član 22.

Sjeme iz domaće proizvodnje deklarirše dorađivač sjemena u skladu sa propisom iz člana 23. stav 3. ovog zakona.

Uvezeno sjeme u originalnom pakiranju deklarirše uvoznik sjemena u skladu sa propisom iz člana 23. stav 3. ovog zakona, a prepakirano uvezeno sjeme deklarirše dorađivač koji je obavio prepakiranje.

Dorađivač i uvoznik sjemena dužni su primjerak deklaracije dostaviti nadležnom kantonalnom ministarstvu i Federalnom ministarstvu.

Član 23.

Zahtjev za izdavanje uzoraka deklaracije podnosi se nadležnom kantonalnom ministarstvu.

Izdavanje uzoraka deklaracije, njihovu distribuciju kantonalnim ministarstvima i vođenje evidencije o izdanim deklaracijama obavlja Federalno ministarstvo.

Veličinu, boju i sadržaj deklaracije za različite kategorije sjemena, uzorak deklaracije te sadržaj, oblik i način vođenja evidencije iz stava 2. ovog člana propisuje federalni ministar.

Član 24.

Sjeme kojem je istekao rok važenja, označen na deklaraciji, vlasnik sjemena ne smije stavljati u promet.

Vlasnik sjemena kojem je istekao rok važenja dužan je pokrenuti postupak utvrđivanja klijavosti i zdravstvenog stanja poljoprivrednog bilja.

Ako se u postupku utvrdi da je sjeme odgovarajuće klijavosti, odnosno zdravstvenog stanja, izdaju se nove deklaracije uz otpremnicu i na ambalaži.

7. Promet sjemena

Član 25.

Prometom sjemena mogu se baviti samo pravna lica koja su registrovana za tu djelatnost kod nadležnog suda.

U promet se smije staviti samo sjeme sorti priznatih u Federaciji.

Član 26.

Prometom sjemena na veliko, mogu se baviti pravne osobe koje pored ostalih uslova za obavljanje te djelatnosti moraju imati i jednog zaposlenog službenika sa stručnom spremom sedmog stepena obrazovanja (VII/I) poljoprivrednog fakulteta ratarskog ili opšteg smjera.

Prometom sjemena na malo, mogu se baviti pravna lica koja pored ostalih uslova za obavljanje te djelatnosti moraju imati jednog zaposlenog službenika sa najmanje četvrtim stepenom obrazovanja (IV) poljoprivredne struke.

Prodavaonica koja prodaje sjeme pakirano do 250 grama ne mora imati službenika iz stava 2. ovog člana.

Pravna lica iz člana 25. stav 1. ovog zakona ne mogu prodavati sjeme izvan prodavaonice.

Pravna lica iz člana 25. stav 1. ovog zakona dužne su sjeme držati u uslovima koji obezbjeđuju održavanje njegovog kvaliteta.

Građani ne smiju stavljati sjeme u promet.

Uslove iz stava 5. ovog člana propisuje federalni ministar.

Član 27.

Iznimno od člana 25. stav 2. ovog zakona, u slučaju nedovoljnih količina sjemena Vlada Federacije može za tekuću godinu dozvoliti stavljanje u promet sjemena sorti koja nisu priznate u Federaciji i sjemena koje odstupa od propisanih osnovnih zahtjeva o kvalitetu sjemena iz člana 20. stav 1. ovog zakona.

8. Uvoz sjemena

Član 28.

Uvozom sjemena može se baviti uvoznik upisan u Registar iz člana 4. stav 1. tačke 4. ovog zakona .

Sortno sjeme može se uvoziti samo ako je sorta priznata u Federaciji.

Sortno sjeme može se uvoziti samo u originalnom pakiranju.

U slučaju potrebe prepakiranja u manja pakiranja, prepakiranje može obaviti dorađivač sjemena.

Iznimno od stava 2. ovog člana, u slučaju nedovoljnih količina sjemena, federalni ministar može za tekuću godinu dozvoliti uvoz sjemena sorti koje nisu priznate u Federaciji.

Iznimno, federalni ministar može dozvoliti i uvoz nedorađenog sjemena ako posjeduje certifikat o sortnosti sjemenskog usjeva i certifikat o zdravstvenom stanju bilja.

Član 29.

Uvezeno sjeme mora uz otpremnicu, ovisno o vrsti bilja imati certifikat o sortnosti (OECD), certifikat o kvalitetu sjemena (ISTA) i certifikat o zdravstvenom stanju bilja (FITOCERTIFIKAT).

Uvezeno sjeme u originalnom pakiranju mora imati deklaraciju na ambalaži izdatu od nadležne ustanove zemlje izvoznice, a kod stavljanja u promet na teritoriji Federacije i deklaraciju u skladu sa propisom iz člana 23. ovog zakona.

Za kvalitet uvezenog sjemena iz stava 2. ovog člana odgovoran je uvoznik.

Uvoznik je dužan prije stavljanja u promet uvezenog sjemena pribaviti uvjerenje o kvaliteti od nadležne ustanove.

Propis o obaveznoj dokumentaciji za određene vrste bilja donosi federalni ministar.

Član 30.

Odredbe ovog zakona o pakiranju, deklariranju i uvozu sjemena ne odnose se na sjeme koje naučne i naučno-istraživačke ustanove primaju ili šalju za oglede ili istraživanja.

Rješenje o odobrenju uvoza sjemena za oglede ili za istraživanje donosi federalni ministar.

9. Proizvodnja presadnica

Član 31.

Proizvodnjom presadnica mogu se baviti pravna lica (u daljem tekstu: proizvođač presadnica) koja su upisana u Registar proizvođača sjemena.

Iznimno od stava 1. ovog člana proizvodnjom presadnica mogu se baviti i fizička lica na osnovu pisanog ugovora o saradnji sa proizvođačem sjemena, a presadnice proizvedene u toj saradnji smatraju se proizvodnjom proizvođača sjemena.

Član 32.

Presadnice se mogu proizvoditi samo od sorti koje su priznate u Federaciji i sorti za koje je podnesen zahtjev za priznanje, odnosno za odobrenje uvođenja u proizvodnju u Federaciji.

Proizvođač presadnica dužan je voditi evidenciju o proizvodnji i o količini proizvedenih presadnica, te o tome izvijestiti nadležno kantonalno i Federalno ministarstvo najmanje jednom godišnje, a najkasnije do 31. decembar tekuće godine.

Sadržaj, oblik i način vođenja evidencije te uzorak izvještaja iz stava 2. ovog člana propisuje federalni ministar.

Član 33.

Prometom i uvozom presadnica mogu se baviti proizvođači i uvoznici presadnica koji su upisani u registre iz člana 4. stav 1. tač. 1. i 4. ovog zakona.

Sorta presadnica koja se uvozi mora biti priznata u Federaciji, osim za vrste za koje je podnesen zahtjev za priznavanje sorte u Federaciji.

Presadnice u prodaji moraju imati deklaracije.

Presadnice iz domaće proizvodnje deklariraju proizvođač presadnica, a uvezene presadnice uvoznik.

Način pakiranja i deklarisanja propisuje federalni ministar.

10. Proizvodnja micelija jestivih i ljekovitih gljiva

Član 34.

Micelij, u pogledu ovog zakona, je čista kultura hifa gljiva na krutoj ili tekućoj podlozi (u fazi rasta) ili u suhom stanju (u fazi mirovanja), a koja služi za umnožavanje gljiva.

Član 35.

Jestive gljive (u obliku micelija), u pogledu ovog zakona, su gljive koje se uzgajaju za ishranu ili u ljekovite svrhe.

Član 36.

Micelija jestivih i ljekovitih gljiva mogu proizvoditi i stavljati u promet pravna lica (u daljem tekstu: proizvođač micelija) koja su upisana u Registar proizvođača sjemena.

O masi proizvedenog micelija proizvođač micelija dužan je izvještavati nadležno kantonalno ministarstvo i Federalno ministarstvo na kraju proizvodnog ciklusa, a najkasnije do 31. decembra tekuće godine. Uzorak izvještaja iz stava 2. ovog člana propisuje federalni ministar.

Član 37.

Prometom i uvozom micelija gljiva mogu se baviti proizvođači i uvoznici micelija koji su upisani u registre iz člana 4. stav 1. tač. 1. i 4. ovog zakona.

Član 38.

Micelij u prometu mora odgovarati deklariranoj vrsti, soju i ne smije biti kontaminiran patogenim štetočinama (virusi, bakterije, gljive, nematode, grinje, grčice i dr.).

Sadržaj deklaracije o vrsti, soju, kvalitetu i načinu pakovanja micelija propisuje federalni ministar.

Deklaraciju iz stava 2. ovog člana izdaje proizvođač i uvoznik micelija u skladu sa propisom iz člana 23. stav 3. ovog zakona.

III POLJOPRIVREDNI SADNI MATERIJAL

1. Kategorije poljoprivrednog sadnog materijala

Član 39.

Kategorije poljoprivrednog sadnog materijala su:

1. Predosnovni sadni materijal za umnožavanje koji se proizvodi pod nadzorom stvaraoca sorte ili njegovih saradnika, služi za proizvodnju osnovnog sadnog materijala, a bez bolesti je, štetočina, virusa, mikoplazmi i viroida;
2. osnovni sadni materijal za umnožavanje koji potiče od biljaka predosnovnog sadnog materijala, uzgaja se pod nadzorom naučne ili naučno-istraživačke ustanove koju je ovlastio federalni ministar (u daljem tekstu: nadležna ustanova), bez virusa je, namijenjen je za podizanje matičnih nasada certificiranog sadnog materijala. U prometu je označen deklaracijom bijele boje;
3. Certificirani sadni materijal za umnožavanje potiče iz osnovnog sadnog materijala. Može se koristiti u obliku materijala za umnožavanje. Namijenjen je i za proizvodnju reznica ili za proizvodnju kalem grančica kategorije standard. Bez virusa je. U prometu je označen deklaracijom plave boje;
4. Standardni sadni materijal koji potiče od certificiranih matičnih stabala, odnosno grmova, kojima su identitet, čistoća sorte i zdravstveno stanje utvrđeni i zagarantirani. Koristi se za proizvodnju sadnica namijenjenih za podizanje voćnih i loznih zasada. U prometu je označen deklaracijom žute boje i slovima S-A.

Kategorije poljoprivrednog sadnog materijal iz stava 1. ovog člana obavezno se koriste u proizvodnji sadnog materijala.

2. Proizvodnja poljoprivrednog sadnog materijala

Član 40.

Poljoprivredni sadni materijal (u daljem tekstu: sadni materijal) mogu proizvoditi pravna lica koja su upisana u Registar proizvođača sadnog materijala.

Iznimno od stava 1. ovog člana proizvodnjom sadnog materijala mogu se baviti i fizička lica na osnovu pisanog ugovora o saradnji sa proizvođačem sadnog materijala, a sadni materijal proizveden u toj saradnji smatra se proizvodnjom proizvođača sadnog materijala.

Član 41.

Proizvođač sadnog materijala može proizvoditi sadni materijal koji je vegetativno potomstvo sorte, podloge ili međupodloge, koje su priznate u Federacije, umnožen od predosnovnoga, osnovnog, certificiranog i standardnog sadnog materijala.

Član 42.

Proizvođač sadnog materijala dužan je voditi knjigu rasadnika, u koju se upisuje ukupno proizvedeni, prodani i uništeni sadni materijal.

O proizvedenom, prodanom i uništenom sadnom materijalu proizvođač je dužan izvještavati nadležno kantonalno ministarstvo koje izvještava Federalno ministarstvo najmanje jednom godišnje.

Sadržaj, oblik i način vođenja knjige iz stava 1. ovog člana, te uzorak izvještaja iz stava 2. ovog člana propisuje federalni ministar.

3. Stručni pregled nad proizvodnjom sadnog materijala

Član 43.

Proizvodnja sadnog materijala u toku vegetacije podliježe obaveznom stručnom pregledu.

Stručnim pregledom sadnog materijala utvrđuje se porijeklo upotrijebljenog sadnog materijala, autentičnost sorte, vegetativna razvijenost i zdravstveno stanje.

Član 44.

Stručni pregled nad proizvodnjom sadnog materijala obavlja naučna ili naučno-istraživačka ustanova koju ovlasti federalni ministar (u daljem tekstu: nadležna ustanova).

Nadležna ustanova iz stava 1. ovog člana je dužna izvještavati Federalno ministarstvo o obavljenom stručnom pregledu na kraju proizvodnog ciklusa, a najkasnije do 31. decembra tekuće godine.

Način i metodologiju po kojoj će se provoditi stručni pregled nad proizvodnjom sadnog materijala i stepen obrazovanja službenika za obavljanje stručnog pregleda, te uslove koje moraju ispunjavati naučne i naučno-istraživačke ustanove iz stava 1. ovog člana propisuje federalni ministar.

Nakon provedenog stručnog pregleda nad proizvodnjom sadnog materijala i na osnovu nalaza stručnog pregleda nadležna ustanova izdaje uvjerenje o porijeklu, kvalitetu, i autentičnosti pregledanog sadnog materijala, odnosno rješenje da proizvedeni sadni materijal ne odgovara propisanim uslovima.

Član 45.

Proizvođač sadnog materijala dužan je pod nadzorom nadležnog kantonalnog ili federalnog poljoprivrednog inspektora uništiti sadni materijal za koji je doneseno rješenje da ne odgovara propisanim uslovima.

Član 46.

Nadležna ustanova dužna je voditi evidenciju o pregledanoj rasadničarskoj proizvodnji prema vrsti, sorti, podlozi i količini pojedinog sadnog materijala.

Sadržaj, oblik i način vođenja evidencije iz stava 1. ovog člana propisuje federalni ministar.

Član 47.

Nadležna ustanova dužna je izvještavati Federalno ministarstvo o obavljenom stručnom pregledu na kraju proizvodnog ciklusa, a najkasnije do 31. decembra tekuće godine.

Uzorak izvještaja iz stava 1. ovog člana propisuje federalni ministar.

4. Kakvoća sadnog materijala

Član 48.

Kvalitet sadnog materijala, glede ovog zakona, je porijeklo, autentičnost sorte i podloge, vegetativna razvijenost i zdravstveno stanje.

Član 49.

Sadni materijal mora odgovarati propisanim osnovnim zahtjevima o kvalitetu.

Osnovne zahtjeve o kvalitetu sadnog materijala uz saglasnost Zavoda za standardizaciju, mjeriteljstvo i patente propisuje federalni ministar.

Član 50.

Kvalitet proizvedenog sadnog materijala u skladu sa propisanim normama utvrđuje nadležna ustanova u rasadniku nakon vađenja iz zemljišta, odnosno prije pakovanja.

Za kvalitet proizvedenog sadnog materijala odgovara proizvođač sadnog materijala.

5. Pakovanje i deklarisanje sadnog materijala

Član 51.

Sadni materijal u prodaji mora biti pakovan, plombiran, imati deklaraciju uz otpremnicu i deklaraciju na ambalaži.

Član 52.

Pakovanje, plombiranje i deklarisanje sadnog materijal vrši proizvođač sadnog materijala na mjestu gdje je dovršena njegova proizvodnja u skladu sa propisom iz članka 53. stavak 4. ovog zakona.

Uvezeni sadni materijal deklarira uvoznik sukladno propisu iz člana 53. stav 4. ovog zakona.

Uvoznik je dužan prije deklarisanja sadnog materijala u skladu sa propisom iz člana 53. stav 4. ovog zakona pribaviti uvjerenje o kvaliteti od nadležne ustanove.

Način pakiranja, plombiranja i deklarisanja sadnog materijala propisuje federalni ministar.

Član 53.

Zavisno od vrste i kategorije sadnog materijala deklaracija na ambalaži mora biti jedinstvena prema sadržaju, veličini, boji te mora imati broj.

Zahtjev za izdavanje deklaracije podnosi se nadležnom kantonalnom ministarstvu.

Izdavanje uzoraka deklaracije, njihovu distribuciju kantonalnim ministarstvima i vođenje evidencije o izdanim deklaracijama vrši Federalno ministarstvo.

Uzorak deklaracija, koju prema kategorijama sadnog materijala i način vođenja evidencije iz stava 3. ovog člana propisuje federalni ministar.

6. Promet sadnim materijalom

Član 54.

Prometom sadnog materijala mogu se baviti samo pravna lica koja su registrovana za tu djelatnost kod nadležnog suda.

Prometom sadnog materijala na veliko mogu se baviti pravna lica koja, pored ostalih uslova za obavljanje te djelatnosti imaju jednog zaposlenog službenika sa stručnom spremom sedmog stepena obrazovanja (VII/I) poljoprivrednog fakulteta opšteg ili voćarsko-vinogradarskog smjera.

Prometom sadnog materijala na malo mogu se baviti pravna lica, koje pored ostalih uslova za obavljanje te djelatnosti u prodavnici moraju imati službenika sa najmanje četvrtim stepenom obrazovanja (IV) poljoprivredne struke.

Pravna lica iz stava 1. ovog člana dužne su sadni materijal držati u uslovima koji obezbjeđuju održavanje njegovog kvaliteta, a sadni materijal ne mogu prodavati izvan prodavnice.

Građani ne smiju stavljati sadni materijal u promet.

Uslove iz stava 4. ovog člana propisuje federalni ministar.

Član 55.

U promet se može staviti samo osnovni sadni materijal, certifikovani i standardni sadni materijal koji odgovara propisanim osnovnim zahtjevima o kvalitetu, za koji je izdano uvjerenje o porijeklu, autentičnosti sorti i podloga i koji je proizveden od sorti koje su priznate u Federaciji, te za koje postoji uvjerenje o zdravstvenom stanju.

Član 56.

Sadni materijal u prometu mora odgovarati propisanom kvalitetu i drugim podacima naznačenim na deklaracijama.

7. Uvoz sadnog materijala

Član 57.

Uvozom sadnog materijala može se baviti uvoznik koji je upisan u Registar iz člana 4. stav 1. tačke 4. ovog zakona.

Uvoziti se može osnovni, certifikovani i standardni sadni materijal koji ima certifikat o porijeklu i autentičnosti vrste, sorte, podloge i zdravstveni certifikat, izdat od nadležne ustanove zemlje izvoznice i koji je od sorti koje su priznate u Federaciji.

Član 58.

Uvezeni sadni materijal uvoznik stavlja u promet u originalnom pakiranju.

Originalno pakiranje, u pogledu stava 1. ovog člana je svako zatvaranje ambalaže na osnovu kojeg se može utvrditi da je originalno pakovanje, a zatvaranje je obavio proizvođač sadnog materijala.

Uvezeni sadni materijal mora imati deklaraciju na ambalaži izdanu od nadležne ustanove zemlje izvoznice, a kod stavljanja u promet na teritoriji Federacije i deklaracije u skladu sa propisom iz člana 52. stav 3. ovog zakona.

Član 59.

Za kvalitet i autentičnost uvezenog sadnog materijala odgovoran je uvoznik.

Ukoliko uvezeni sadni materijal ne zadovoljava propisanu kvalitetu, uvoznik ga je dužan uništiti.

Član 60.

Odredbe ovoga zakona o pakovanju, deklarisanju i uvozu sadnog materijala ne odnose se na sadni materijal koje naučne i naučno-istraživačke ustanove šalju ili primaju za ogleda ili istraživanje.

Rješenje o odobrenju uvoza sadnog materijala za ogleda ili istraživanja donosi federalni ministar.

IV- KONTROLA UVOZA SJEMENA, SADNOG MATERIJALA, PRESADNICA, MICELIJA JESTIVIH I LJEKOVIH GLJIVA PREKO GRANIČNIH PRIJELAZA FEDERACIJE BOSNE I HERCEGOVINE

Član 61.

Sjeme, sadni materijal, presadnice, micelij jestivih i ljekovitih gljiva (u daljem tekstu: reprodukcioni materijal) može se uvoziti samo od sorti koje su priznate u Federaciji.

Iznimno od stava 1. ovog člana može se na osnovu saglasnosti federalnog ministra uvoziti reprodukcioni materijal od sorti koje nisu priznate u Federaciji, ako se uvozi radi potrebe oplemenjivanja bilja, vođenja postupka priznavanja i zaštite sorti poljoprivrednog bilja, te radi umnožavanja za potrebe izvoza.

Reprodukcioni materijal koji se uvozi prema st. 1. i 2. ovog člana mora imati dokumente propisane članom 29. stav 1. i članom 57. stav 2. ovog člana.

Član 62.

Reprodukcioni materijal iz člana 63. ovoga zakona podliježe obaveznoj kontroli koju vrši federalna granična inspekcija za zaštitu bilja na graničnom prijelazu (u daljem tekstu: federalna granična inspekcija).

Ako se uvozi reprodukcioni materijal od sorti poljoprivrednog bilja koje nisu priznate u Federaciji, a koje ne posjeduju odgovarajuću dokumentaciju u skladu sa propisom iz člana 61. stav 3. ovog zakona, odnosno nema saglasnost iz člana 61. stav 2. ovog zakona federalni granični inspektor zaštite bilja (u daljem tekstu: federalni granični inspektor) donosi rješenje o zabrani uvoza tog reprodukcionog materijala.

Rješenjem iz stava 2. ovog člana federalni granični inspektor naređuje da se reprodukcioni materijal vrati pošiljatelju ili uništi.

Reprodukcioni materijal što ga građani unose u Federaciju ili koji pristiže poštom organi carinske službe prijavljuju federalnom graničnom inspektoru radi kontrole u skladu sa st. 1., 2. i 3. ovog člana.

Organi carinske službe ne mogu cariniti reprodukcioni materijal odnosno ne mogu upućivati te pošiljke na carinjenje drugim carinarnicama na teritoriji Federacije dok od federalnog graničnog inspektora na graničnom prijelazu ne dobiju potvrdu o obavljenoj kontroli u skladu sa stavom 1. ovog člana.

Protiv rješenja federalne granične inspekcije iz stava 3. ovog člana može se podnijeti žalba federalnom ministru.

Žalba se podnosi u roku od osam dana od dana dostave rješenja.

Žalba ne zadržava izvršenje rješenja.

Član 63.

Pravna lica plaćaju naknadu troškova za:

1. izvršeni stručni pregled nad proizvodnjom sjemena i sadnog materijala poljoprivrednog bilja iz člana 9. stav 2. i člana 44. ovog zakona;
2. utvrđivanje kvaliteta i deklarisanja sjemena i sadnog materijala iz čl. 23., 24., 29., 33., 38., 50., 53. i 58. ovog zakona.

Visinu naknada iz stava 1. ovog člana propisuje federalni ministar. Naknade iz stava 1. tačke 1. ovog člana prihod su nadležne ustanove, a naknade iz stava 1. tačke 2. ovog člana prihod su Budžeta Federacije Bosne i Hercegovine odnosno laboratorije za kontrolu kvaliteta.

Član 64.

Upravni nadzor nad provođenjem ovog zakona i nadležnih pravnih lica u prenijetim im poslovima iz nadležnosti federalnog organa uprave provodi Federalno ministarstvo.

Član 65.

Inspeksijski nadzor propisan ovim zakonom i propisima donesenim na osnovu njega vrši federalni organ uprave nadležan za poslove poljoprivredne inspekcije (u daljem tekstu: federalna poljoprivredna inspekcija) i kantonalni organi uprave nadležni za poslove poljoprivredne inspekcije (u daljem tekstu: kantonalna poljoprivredna inspekcija).

Poslove inspeksijskog nadzora iz nadležnosti federalne i kantonalne poljoprivredne inspekcije vrše poljoprivredni inspektori.

Član 66.

Poslove federalnog i kantonalnog poljoprivrednog inspektora može obavljati diplomirani inženjer poljoprivrede-opšteg, ratarskog odnosno voćarsko-vinogradarskog smjera, sa najmanje tri (3) godine radnog iskustva, sa položenim stručnim upravnim ispitom službenika organa uprave i službi za upravu i posebnim stručnim ispitom iz oblasti poljoprivrede.

Program posebnog stručnog ispita iz oblasti poljoprivrede, sastav komisije i način provedbe ispita za poljoprivrednog inspektora iz stava 1. ovog člana, propisuje federalni ministar.

Član 67.

Federalna poljoprivredna inspekcija:

1. kontroliše uvoz i izvoz sjemena, sadnog materijala, presadnica i micelijuma ljekovitih i jestivih gljiva preko graničnih prijelaza na području Federacije;
2. kontroliše ispunjavanje uslova pravnih lica upisanih u registre proizvođača sjemena, sadnog materijala, presadnica i micelija i registre dorađivača sjemena i sadnog materijala;
3. obavlja sve poslove i zadatke iz nadležnosti kantonalne poljoprivredne inspekcije ukoliko ova iz ma kojeg razloga ne izvršava poslove i zadatke utvrđene ovim zakonom i propisima donesenim na osnovu njega;
4. rješavanje po žalbama na rješenja kantonalne poljoprivredne inspekcije;
5. nadgleda i ostale poslove propisane ovim zakonom .

Kantonalna poljoprivredna inspekcija

Kantonalna poljoprivredna inspekcija obavlja sve poslove inspekcijskog nadzora osim poslova za koje je ovim zakonom određeno da ih direktno obavlja federalna inspekcija, a naročito:

1. kontroliše poljoprivredno zemljište, objekte nasada, objekte za doradu, skladišta, opremu, prijevozna sredstva i propisane dokumente za sjeme, sadni materijal, presadnice i micelij poljoprivrednog bilja;
2. nadzire vrste bilja koje nije dopušteno uzgajati na području kantona u skladu sa naredbom federalnog ministra;
3. nadzire proizvodnju, žetvu odnosno berbu, skladištenje, promet sjemena, sadnog materijala, presadnica i micelija;
4. uzima uzorke sjemena radi davanja na analizu;
5. naređuje izmjenu deklaracija ako utvrdi da sjeme, sadni materijal, presadnica i micelij nisu deklarisanog, odnosno propisanog kvaliteta;
6. naređuje otklanjanje neispravnosti kvaliteta i drugih uvjeta, koje moraju udovoljavati sjeme, sadni materijal, presadnice i micelijum;
7. zabranjuje stavljanje u prodaju sjemena, sadnog materijala, presadnica i micelija, ako utvrdi da ne zadovoljavaju kvalitet i druge uslove propisane ovim zakonom;
8. privremeno zabranjuje, do donošenja konačnog rješenja, prodaju poljoprivrednog sjemena i sadnog materijala, ako prodavnice ne zadovoljavaju propisane uslove;
9. privremeno oduzima sjeme, sadni materijal, presadnice i micelijum, te druge predmete u vezi s njihovom proizvodnjom, odnosno doradom, do donošenja konačnog rješenja;
10. naređuje uništavanje i nadzire postupak uništenja sjemena, koje se ne bi moglo iskoristiti direktno ili u prerađenom stanju za ljudsku i stočnu hranu ili za industrijsku preradu;
11. naređuje uništavanje i nadzire postupak uništenja sadnog materijala čija proizvodnja i promet nije dozvoljen;
12. vodi službene podatke za područje kantona o povredama odredaba ovog zakona i propisa donesenih na osnovu njega;
13. izvještava nadležne organe federalne uprave o nepravilnostima i traži provođenje određenih postupaka, ako sama nije nadležna za poduzimanje odgovarajućih mjera;
14. podnosi prijavu za privredni prijestup i prijavu za pokretanje prekršajnog postupka radi povrede odredaba ovog zakona i propisa donesenih na osnovu njega.

Član 68.

Poljoprivredni inspektor u obavljanju inspekcijskog nadzora provodi postupak u skladu sa Zakonom o upravnom postupku ("Službene novine Federacije BiH" br. 2/98 i 48/99) i Zakona o upravi Federacije Bosne i Hercegovine ("Službene novine Federacije BiH" broj 28/97).

Član 69.

Poljoprivredni inspektor donijet će rješenje i odmah narediti izvršenje, kada utvrdi da pravno lice vrši djelatnost za koju joj je radi učinjenog privrednog prijestupa ili prekršaja izrečena zaštitna mjera zabrane obavljanja djelatnosti.

U provođenju rješenja iz stava 1. ovog člana poljoprivredni inspektor će pečaćenjem, ili na drugi način, zatvoriti prostorije (objekt) u kojem se obavlja djelatnost, a može do konačne odluke nadležnog organa oduzeti opremu, uređaje, sredstva za rad i prijevozna sredstva kojima se obavlja djelatnost.

Član 70.

Ako poljoprivredni inspektor posumnja da sjeme ne odgovara ulovima propisanim ovim Zakonom i propisima donesenim na osnovu njega, uzeće određeni broj uzoraka i dostaviti ih na analizu nadležnoj laboratoriji.

Uzorci za analizu dostavljaju se pod šifrom.

Način uzimanja uzoraka, broj i masu propisuje federalni ministar.

Član 71.

Proizvođač, dorađivač i uvoznik sjemena (u daljem tekstu: vlasnik uzorka) može u roku od osam dana od dana prijema rezultata analize zahtijevati od poljoprivrednog inspektora da drugi primjerak uzorka dostavi nadležnoj laboratoriji na superanalizu.

Superanalizu može zahtijevati i poljoprivredi inspektor u roku iz stava 1. ovog člana, ako posumnja u rezultat analize.

Nalaz superanalize konačan je i može se pobijati samo pod uslovima i način propisan za pobijanje javnih isprava.

Član 72.

Vlasnik uzorka dužan je podmiriti troškove analize, odnosno superanalize uzoraka.

Vlasnik proizvoda od kojeg je uzet uzorak nema pravo na naknadu vrijednosti uzorka.

Član 73.

Federalno ministarstvo rješava po žalbama protiv donesenih upravnih akata nadležnih ustanova u vršenju povjerenih javnih ovlaštenja .

Protiv rješenje Federalnog ministarstva na osnovu ovog zakona, u prvom stepenu nije dopuštena žalba nego se može pokrenuti upravni spor.

Protiv rješenje kantonalne poljoprivredne inspekcije na osnovu ovog zakona, može se izjaviti žalba Federalnom ministarstvu u roku od 15 dana od dana dostavljanja rješenja.

Žalba izjavljena na rješenja koje je donijeto na osnovu člana 69. stav 1. ovog zakona ne zadržava izvršenje rješenja.

Član 74.

Zaključak o dozvoli izvršenja rješenja poljoprivredni inspektor dužan je donijeti bez odlaganja, a najkasnije u roku od osam dana od dana kada je rješenje postalo izvršno.

V - KAZNE ODREDBE

Član 75.

Novčanom kaznom od 20.000, 00 KM do 50.000,00 KM kaznit će se za privredni prijestup pravno lice :

1. ako proizvodi sjeme, a nije upisano u Registar proizvođača sjemena (član 7. stav 1.);
2. ako uzgaja ili umnožava vrste poljoprivrednog bilja koje nije dopušteno uzgajati (član 7. stav 2.);
3. ako stavlja u prodaju sjeme koje nije dorađeno (član 12. stav 2.);
4. ako sjeme u prometu nije na propisan način pakovano i deklarirano, odnosno ako uz otpremnicu nema dokumentaciju (član 21. stav 1.);
5. ako stavi u promet sjeme sorti koje nisu priznate u Federaciji (član 25. stav 2.);
6. ako uvozi sortno sjeme , a nije upisan u Registar uvoznika (član 28 . stav 1.);
7. ako uvezeno sjeme uz otpremnicu nema propisane dokumente (član 29. stav 1.);
8. ako proizvodi sadni materijal a nije upisan u Registar proizvođača sadnog materijala (član 40.);
9. ako proizvodi sadni materijal koji nije vegetativno potomstvo priznate sorte (član 41. stav 1.);
10. ako u promet stavi sadni materijal u suprotnosti sa odredbama čl. 55. i 56. ovog zakona,
11. ako uvozi sadni materijal u suprotnosti sa odredbama člana 57. stav 1. ovog zakona,

Za privredni prijestup iz stava 1. ovog člana kaznit će se novčanom kaznom u iznosu od 500,00 KM do 5.000, 00 KM i odgovorno lice u pravnom licu.

Član 76.

Novčanom kaznom od 15.000, 00 KM do 30.000,00 KM kaznit će se za privredni prijestup pravno lice :

1. ako u toku vegetacije nije obavilo obavezni stručni pregled (član 8. stav 1.);
2. ako dorađuje sjeme a nije upisano u Registar dorađivača sjemena (član 13. stav 1.);
3. ako u cjelini ne isporuči naturalno sjeme sitno-sjemenih mahunarki dorađivaču sjemena (član 15. stav 3.);
4. ako je preuzelo naturalno sjeme za koje nema uvjerenje o priznanju usjeva (član 16. stav 1.);
5. ako je stavilo u promet partiju sjemena za koju nije utvrđen kvalitet (član 19. stav 1.);
6. ako se bavi prometom sjemena a nije registrovano za tu djelatnost (član 25. stav 1.);
7. ako uvozi sortno sjeme koje nije originalno zapakovano (član 28. stav 3.);
8. ako prepakiranje nije izvršio dorađivač sjemena (član 28. stav 4.);
9. ako ne vodi propisanu knjigu rasadnika (član 42. stav 1.);
10. ako u toku vegetacije nije izvršen stručni pregled (član 43. stav 1.);
11. ako uništi sadni materijal bez nadzora poljoprivrednog inspektora (član 45.);
12. ako sadni materijal u prometu nije pakovan, plombiran i deklarisan na propisani način (član 51.).

Za privredni prijestup iz stava 1. ovog člana kaznit će se novčanom kaznom u iznosu od 200,00 KM do 2.500, 00 KM i odgovorno lice u pravnom licu.

Član 77.

Novčanom kaznom od 1.000, 00 KM do 5.000,00 KM kaznit će se za prekršaj pravno lice:

1. ako ne dostavi izvještaj o obavljenom stručnom pregledu Federalnom ministarstvu (član 9. stav 2.);
2. ako ne vodi evidenciju o izdanim uvjerenjima o priznavanju sjemenskog usjeva (član 10. stav 3.);
3. ako ne vodi evidenciju o masi preuzetog sjemena (član 14. stav 2.);
4. ako komponente u mješavini ne udovoljavaju uslovima kvaliteta (član 15. stav 2.);
5. ako nije uništila otpad nastao doradom (član 15. stav 4.);
6. ako nije obezbijedilo potrebne podatke kod prijevoza naturalnog sjemena (član 17. stav 2.);
7. ako stavi u promet sjeme kojem je istekao rok važnosti a nije utvrdilo klijavost, odnosno zdravstveno stanje (član 24. stav 1.);
8. ako nema službenika sa stručnom spremom sedmog stepena obrazovanja (član 26. stav 1. i član 54. stav 2.);
9. ako u prodavnici nema službenika sa stručnom spremom četvrtog stepena obrazovanja (član 24. stav 2. i član 54. stav 3.);
10. ako prodaje sjeme i sadni materijal izvan prodavnice (član 26. stav 4. i član 54. stav 4.);
11. ako ne drži sjeme u uslovima koji obezbjeđuje njegov kvalitet (član 26. stav 5.);
12. ako stavi sjeme i sadni materijal u promet u originalnom pakovanju bez deklaracije na službenom jeziku Federacije (član 29. stav 2. i član 58. stav 3.);
13. ako se bavi proizvodnjom presadnica a nije upisano u Registar proizvođača sjemena (član 31. stav 1.);
14. ako proizvodi presadnice od sorti koje nisu priznate u Federaciji (član 32. stav 1.).

Za prekršaj iz stava 1. ovog člana kaznit će se novčanom kaznom u iznosu od 300,00 KM do 1.000, 00 KM odgovorno lice u pravnom licu.

Član 78.

Novčanom kaznom od 300, 00 KM do 1.000,00 KM kaznit će se za prekršaj pravno lice:

1. ako stavi u promet presadnice koje nemaju deklaracije na propisanom uzorku (član 33. stav 3.),
2. ako presadnice nisu pakovane i označene na propisani način (član 33. stav 4.),
3. ako stavi u promet micelij gljiva, a nije upisano u Registar proizvođača sjemena (član 36. stav 1.),
4. ako micelij u prometu ne odgovara deklarisanom kvalitetu (član 38.).

Za prekršaj iz stava 1. ovog člana kaznit će se novčanom kaznom u iznosu od 100,00 KM do 500,00 KM odgovorno lice u pravnom licu.

Član 79.

Novčanom kaznom od 100, 00 KM do 500,00 KM za učinjeni prekršaj, kaznit će se građanin ako stavi u promet sjeme i sadni materijal (član 26. stav 6. i član 54. stav 6.) ili ako učini bilo koju od radnji iz čl. 77. i 78. ovog zakona.

VI PRIJELAZNE I ZAVRŠNE ODREDBE

Član 80.

Propise na osnovu ovlaštenja propisanih ovim zakonom donijet će federalni ministar u roku od godinu dana od dana stupanja na snagu ovog zakona.

Do donošenja propisa iz stava 1. ovog člana na teritoriji Federacije primjenjivat će se propisi koji su se primjenjivali do dana stupanja na snagu ovog zakona, ako nisu u suprotnosti sa odredbama ovog zakona.

Član 81.

Danom stupanja na snagu ovog zakona prestaju se primjenjivati na teritoriji Federacije Bosne i Hercegovine zakoni i drugi propisi o sjemenu i sadnom materijalu poljoprivrednog bilja koji su se primjenjivali do dana stupanja na snagu ovog zakona, ako ovim zakonom nije drugačije određeno.

Član 82.

Ovaj zakon stupa na snagu osmog dana od dana objavljivanja u "Službenim novinama Federacije BiH".